

UKA 2025/85: Uunga siunnersuut Nalunaaquttap aalajangersarneqarnera pillugu Inatsisartut inatsisaata allanngortinneqarneranik Inatsisartut inatsisaat (Nalunaaquttat ingerlaqatigiiffiannut allamut ikaarsaarneq, aasaanerani nalunaaquttap atorunnaarsinneqarnera)
(Inatsisartunut ilaasortat Naleraq)

UKA 2025/104: Uunga siunnersuut Nalunaaquttap aalajangersarneqarnera pillugu Inatsisartut inatsisaata allanngortinneqarneranik Inatsisartut inatsisaat (Nalunaaquttat ingerlaqatigiiffiannut allamut ikaarsaarneq, aasaanerani nalunaaquttap atorunnaarsinneqarnera)
(Siumut)

Akissuteqaat
(Naalakkersuisut Siulittaasuut)

Siullermeerneqarnera

Siumumut aamma Inatsisartunut ilaasortanut Naleqqameersunut siunnersuutitut qujanaq.

Siunnersuutit taakku marluk oqaasertatigut assigiingajalluinnarput nalunaaquttallu aalajangersarneqarnera eqqarsaatigalugu allannguutissanik pingaarutilinnik marlunnik imaqarlutik. Siunnersuutit malillugit nalunaaquttat ingerlaqatigiiffiat allanngortinneqassaaq, ulloq 25. marts 2023 nalunaaquttat ingerlaqatigiiffii atorunnaakkavut uterfigeqqillugit kiisalu aasaanerani nalunaaqutaq atorunnaarlugu.

Inatsisartut nalunaaquttap aalajangersonera pillugu inatsit atatsimoorlutik aalajangersaaviginikuuaat taamanilu isumaqatigiikkaluarluta piffissamik aalajangersaasarnermut isummat assigiingisitaalersimapput, tamannalu siunnersuutini saqqummiunneqartuni takuneqarsinnaavoq. Innuttaasut inuussutissarsiummillu ingerlataqartut pisariaqartitaminnik piumanerusaminnillu assigiinngitsunik nassuiaateqarsimapput.

Naalakkersuisut maluginiarppaat tusarniaanermut akissutit siunnersuuteqartut namminneq pissarsiarisimasaasa nalunaaquttap aalajangersorneqarneranut atatillugu misilittagaalersunik aammalu isummamik ersersitsisut. Tusarniaanermi akissutigineqartut takutippaa suliffeqarfiit amerlasuut allannguut attatiinnarusukkaat ilaatigulli aamma allannguissamut kissaateqartut arlaqarlutik.

Tusarniaanermi akissutit katillugit qupperit 179-iupput, taakkunani nalunaaquttap aaqqissuunnera isummersuutit illersuisunik aammalu akerliusunik ersersitsillutik. Suliffeqarfinnik ingerlatsisuniit akissuteqaatini erseqqissaatigineqarpoq allannguneq aningaasatigut annertuumik kinguneqarnissaa allalli sungiusimasamut uternissaaq kissaatigalugu.

Erseqqissaatigissavara maannakkut Naalakkersuisut Naalakkersuisut siulii assigalugit aasaanerani nalunaaqutaq EU-mi atorunnaarsinneqarpat Kalaallit Nunaanni aamma atorunnaarsinneqassasoq isumaqataaffigigaat erseqqissarneqassaaq. EU-parlamentip 2019-imi

2/3-mit annerusumik taperserneqarluni aasaanerani nalunaaquttap atorunnaarnissaanut Isumalioqatigiissitami siunnersuut tapersersorsimavaa. EU-mi nunat inatsimmut tassunga assigiinngitsunik kissaateqarneri pissutigalugit aalajangerup piviusunngortinniarnera sivitsortoorsimavoq. Taamaattumillu aasaanerani nalunaaquttap allanngortinneqartarnerata Europa-mi qaqugu piviusunngortinneqarnissaa oqaatigineqarsinnaanani.

Tusarniaanermi akissutigineqartorpasuit aalaavigalugit Naalakkersuisuniit inassutigissavarput ataatsimiititaliami siunnersuutit oqallisigineqarnissaat tassanilu inernilunneqartut aalaavigalugit Naalakkersuisut sulineq ingerlakkumaarlugu.